

四庫全書

集部

欽定四庫全書

集部

襄陵文集卷一至三

詳校官庶吉士臣陳若霖

侍讀臣孫球覆勘

謄錄監生臣任溥

謄錄監生臣黃鍾

謄錄副貢生臣杭光晉

欽定四庫全書

集部三

提要

襄陵文集十二卷

別集類二 宋

臣等謹案襄陵文集十二卷宋許翰撰翰字

崧老拱州襄邑人元祐三年進士徽宗欽宗

時再為給事中擢同知樞密院以議論不合

去高宗即位召為尚書右丞兼權門下侍郎

復乞宮祠以歸事迹具宋史本傳據蔡條鐵

圍山叢談所載條與翰蓋最相契然史稱翰
于宣和間即奏記蔡京謂百姓困弊起為盜
賊天下有危亡之憂願罷雲中之師修邊保
境時不能用其後燕山之役卒以召釁論者
謂其有曲突徙薪之謀其諫种師道不當罷
疏至三四上亦深得救時要領至南渡後入
踐政府極論黃潛善姦邪而力言李綱忠義
可用致為宵小齟齬去位生平正直之節終

始不撓今所上章奏具在集中其勁氣凜然
猶可想見然則條所記錄亦為其西清詩話
依附蘇黃以求名耳不足為翰累也翰所著
有論語解春秋傳諸書蓋頗究心於經術深
故發為文章具有源本惟論配享劄子一通
稱揚雄與孟子異世同功請以配食孔子廟
廷位次孟子其說頗為誣謬耳陳振孫書錄
解題稱襄陵集二十四卷其本久佚今據永

樂大典所載採輯編次釐為十二卷其奏疏
為永樂大典所原缺者則別據歷代名臣奏
議補入庶直言讜論猶得以考見其什一云
乾隆四十六年九月恭校上

總纂官

臣紀昀

臣陸錫熊

臣孫士毅

總校官

臣

陸

費

墀

欽定四庫全書

襄陵文集卷一

宋 許翰 撰

制

蔡卞除待制制

為點對玉
嬰神變經

朕祇若天命開明道機嘉與羣生共蒙休祉制為真簡
備著靈文應選時才是正謬誤逮觀奏御咸極精深某
官生於名家席其素業文學之譽聲動膠庠辦治之能
風生郡縣比自合宮之貳陞聯祕殿之華成書既刊賞

渥宜懋遂參法從是謂異恩益勵猷為往膺寵獎

虔州坑壩火齊之才可承信郎制

為自備才力
不借官本費

到淨利依
格補官

勅某地有珍產爾能發之以佐國用在法當錄勉爾力
以聽官使可

邵護為父陣亡可承信郎制

士有伏節死事不得身受典賞則子獲承之所以明恩
而起信也俾秩以官用勸忠順往服恩榮圖所以報可

金重寶等授承信郎制

邊吏無良羌戎弗率靖夏失守覆我嘉師朕心憮焉不
忘震悼深詔執事厚錄其孤俾秩以官用慰伏節惟忠
惟孝往服恩榮勿忝前修祇若予訓

節度使郭仲妻姪陳乞補承信郎制

朕於殿巖之臣加厚其老而勤恤其亡猶以為未也至
其族姻多俾甄錄而爾蒙澤焉往飭其躬以聽官使可
蕃官男為父陣亡補承信郎制

勅某等朕以仁覆天下欲息兵甚間者夏賊擾邊師不得息至使豪俊制壽於鋒鏑忠義伏節於原野非朕志也故深詔執事錄死事者之子孫厚厥寵秩稱朕所以哀矜之意可

周江呈試武藝補承信郎制

有司以爾武力聞朕臨觀便殿挽強蹶勁可官而使往祇寵命圖所以報可

策伊克阿授承信郎制

邊吏言爾去戎即華忠効純白有力於軍旌爾以官往
其圖報

綽爾授承信郎制

爾能勤事伏節精白著明而弗獲受賞朕甚矜之秩爾
以官用勸忠順

待詔沈明補承信郎制

爾服勤禁苑積有功緒寵以官使往虔勿懈可

林致和修造所有勞並補承信郎制

勅爾等祇服禁嚴有勞可錄膺茲寵秩往懋事功可

黃宴實可承節郎制

爾能深入谿洞斬馘醜虜陷銳不顧傷夷可矜秩以官

榮勵厥忠勇

蕃官莫延豐納土補承節郎制

盛時普覆遠人咸賓谿洞阻深籍土來請嘉爾首奮忠
孝精白被以恩華往為榮耀

太學生充大晟府製撰葛底幾補迪功郎制

爾以太學諸生業文游藝隸職樂府詞采可觀既閱歲
時當蒙差錄登于初秩往勵修能可

郭蔓之等並可閤門宣贊舍人制

爾父為國虎臣茂建帥節出捍邊圉入護殿嚴蔚有勞
能宜蒙壽祉奄云淪謝朕甚悼焉俾錄諸孤用示勤恤
或增爾秩或躋爾職咸膺異數往紹遺表可

胡臧轉遥郡刺史制

比命元樞宣威西夏分遣官吏充備使令逮此罷司咸

蒙序績爾釋軒墀贊相之職而膺郡符刺舉之榮是謂
異恩毋忘報効

耿自求鹽課轉官制

有司言爾能督縣吏勸耕鹵壤抑末業之民使著於本
不惟鹺利是通懋進厥官用疇祇敏

王履轉官制

轉行
朝議

非法則天下之分不定非德則天下之志不通朕執成
憲以御多方而時因人心有所施予所以示德也爾子

持國使節願還任子之恩以進爾官雖詭著令朕方務
惇孝治安得不委聽焉可

朱芾轉官制

監察御史前任修
肇基發祥宮了畢

維伊雒之山川閔祖宗之弓劍宜伸福祿益佑神靈是
考祠宮用嚴像教規摹大壯之制謳歌長發之祥不曰
告成有嘉時敏肆敷斯寵懋著厥勤爾以一時之英嘗
總百工之事其增榮秩益勵修能

時道陳轉官制

爾揚國使節董振一路攝總茶事僅踰歲年則商賈阜
通貨賄滋殖逋負之民爭輸不絕可謂能矣疇用進官
以示褒勵

待制王本轉官制

提舉京畿應副燒
軍德樓琉璃等

勅朕新宮城之象魏重邦國之威靈工師効能郡縣共
職獲曜臨彼四海用祇若予一人凡與有功咸宜受祉
某官頃揚使節實總畿封覽梵所資甄陶必濟嘉爾經
營之力疏茲優渥之恩疇以寵榮往其膺保可

石思轉官制

為應副宣德樓催
促東南路木植

勅朕新宮城之象魏重邦國之威靈工師效能郡縣共
職獲曜臨彼四海用祇若予一人凡與有功咸宜受祉
某官以爾比膺登擢往使東南能出窮山之材以奉凌
雲之構有嘉幹濟是錫寵榮懋厥進修圖夫報稱可

李宗旦邊功轉一官蕃官藏布轉兩官制

疆場之事金革時交數級論功是亦曩典往膺榮秩圖
報厚恩可

爾以長技為國捍邊上功幕府疏榮增秩為爾種落光寵使咸知忠順之利可

都壕塞履正大夫藍安民修置積水轉官制

勅先王制地之法溝洫澮川與田壤錯氣有所導水不羨溢後世田非古制河渠簡少而又官吏玩常不以時濬故歲或一水則民被其災爾某官等比受詔旨相觀高下疏川導滯以利旬服計不愆素役不告勞懋進厥官用序爾績可

防禦使曹澤等轉官制

勅因事著能臣隣所務計功疏寵君道之常某官識度
敏明材猷強濟比將詔旨以董事功決塞有方經營不
日亦何愛於榮秩以加賁於成勞勵爾忠勤副朕眷獎
可

勅王宗望等制

勅因事著能臣隣所務計功疏寵君道之常某官識度
敏明材猷強濟比將詔旨之嚴往視河渠之役逮茲底

績實與有勞亦懋官榮用疇忠力可

楚拉等轉官制

眷言戎索久壯邊威靜則為國藩籬動則為軍犄角第
功論賞豈限彝章

張域轉官制

瀘南郡縣華戎錯居土多曠而弗耕俗率獷而未擾比
召邊吏募民為兵授田以籍教之耕戰使財用內足於
疆陲而威聲外震於蠻貊庶幾南服恃以阜安爾以材

猷克將使指經營鎮撫跡登厥緒奏功來上朕甚嘉之
懋進榮資用勸忠力

李宗旦邊功轉官制

爾出服戎昭歸數軍實而以多獲聞進秩躡等往旌忠
力

蒙山等邊功轉官制

險道傾側且馳且射風雨罷勞饑渴不困凡戎之長技
蕃堡皆有焉征西之役大兵衝加以衆而蕃堡以其

長技與之毒逐故戰無不克今國家賞爾於此則少褒
矣不立奇功以自著其亦何以報哉夫能去戎即華又
能承天下之威首奮而有功焉是皆王靈之所宜嘉懋
官一等以勵忠順

知延安府劉延壽轉官制

勅祖宗以來關陝之間鼓鐵為幣民習安之而比年郡
縣法令益弛無以權物錢遂大輕用詔司存以時矯革
某官克祇成命並警列城來奏敏功取先諸道市不敢

貢以順指令家無或殊咸適志願有嘉所列懋進爾官夫
治民以康阜為功而事君以忠信為德勉終諧允務稱
褒榮可

廉訪使者羅宇轉官制

勅朕有作猷付之郡縣凡奏功於同日則列爵而普疇
矧在使華可無褒勵爾選於近著省彼列城攬廊延之
奏功首關陝之諸道嘉爾董振錫賜恩榮茂進厥官益
祇乃事可

孔弼邊功轉官制

作制戎城襟帶西陲屯兵嚴固據賊要害而版築告成
莫或犯獵將必有師旅震疊捍衛之勤爾能於此馘其
首豪而第功焉超遷厥秩用勸忠力

李紹邊功轉官制

朕設爵賞以待功吏以狀聞小大必錄往膺斯渥益懋
爾能可

侯中立宣司結局轉官制

西方用兵郡縣被其勞今天誘戎心釋兵請命朕因時制宜詔使邊吏保疆與民休息而大臣具列爾等給凡軍事有功前日肆增爾秩以休厥勤可

屬遣近輔經畧遠人威武屢揚羣醜既屈豈特將吏之外捍亦繫司存之內勤爾等咸以時材典斯禁帑實濟戎務使無乏興懋進厥官用疇爾事可

曹鼎等邊功轉官制

古人有言曰武功以顯重今爾僅獲二級而躡進四官

未有顯功而褒賞已重矣往思所以為報將何如哉

夫國恩無窮而人之所受各以其分爾等尚能計爾之功觀爾之賞必將竦愷而思所以報矣

窮蜀絕徼蠻夷雜居羣吏圖功矢石屢接爾亦於此第賞入流徃服恩榮尚懷忠報

王淵為修兔原河轉官制

日者大河南蓄廣武以危清汴爾父疏兔原河又為直河殺水之怒黃濁比徙頻河郡縣無決溢憂都城晏安

俱賴其力進爾之秩用示褒嘉詩不云乎維其有之是以似之爾其勉焉可

中書舍人梅執禮神霄宮進書轉一官制

朕定摹神霄宏貴珍館著為憲令祇若神休鬱彼琅書陳于几閣某官才高文富學優識明頃在宰司實與次之逮茲奏御不廢疇庸往服明恩益圖遠業可

穆沃攻討轉官制

勅夏人敢桀桀偽永強軍以闕邊環慶出師擊破之將

吏有功可咸甄序可

勅趙福等制

黠羌不靖屢犯芻蕘邊吏捍禦使無大侵數級計功咸
使叙進可

勅安祥等制

將吏出境交綏獲級邊書上功無不褒錄賞小為明是
以軍志可

勅姚蕪仲等制

夏賊玩武築城屯聚以闕邊利臨以天下兵蕩析不保
咸使書功可

范秘趙子游轉官制

勅某人等事無不可輯也難在輯事而不擾於民官非
不可取也要在取官而無愧於國茶法馬政行於秦蜀
爾等實贊使事以濟辦聞朕甚嘉之懋官一等以旌其
能顧朕深居法宮瞻望參井之間去國萬里將明德意
屬在使軺其各誠乃心禮佐厥長往思所以奉事而不

擾者則多取予官而無愧焉

趙永亨等轉官制

朕覽邊奏第功肆賞爾以天壕原功進秩二等往膺恩
榮務盡忠力

勅封承彥制

帥司言爾以伏兵逆敵軍無失亡而有獲焉俾進厥官
以勵餘勇

勅劉彥勲制

疆陲有警將吏論功名在捷書慶賞斯下欲人知赴敵
蒙利之速也

高棟轉官制

為六朝寶訓告成

祖宗至意典冊具存比詔儒臣聿修先訓爾某官克祇
于事躋登厥功逮奏成書有嘉勤力懋陞榮秩增重橫
班往服恩華益圖報稱

詹事轉官制

為任發運使日改
宮觀及德士等事

朕不愛爵賞以待天下之能有功者蓋以狀聞則必差

錄爾某官奉使江淮取寵頻繁致位光顯可謂能矣今又計爾冠巾出衆使州處於宮觀無或拒違又籍其西方之具輸銅縣官綜是六州之功而增厥秩焉資清職近觀聽所榮益勵猷為以圖報稱可

都水丞榮毖等轉官制

勅某官等官吏奉事不廢職也而比年以來輕重眡勞每加賞焉者所以示厚國家之恩豈有量哉爾等前日廣武諸役力捍大河使不為敗咸序其績懋官以勸是

維寵渥往其欽哉可

畢桓等轉官制

勅某官等蓋聞樂出於虛而成於和天下之治至於幽明之德交歸而飛潛之類無間此樂之道帝王公孤之任也其在於器有數有度節奏有文則學士大夫之所請明有司之所持循職業必有所萃矣爾等咸以時材與聞樂事建定鐘律旅陳陞庭臨觀有嘉金石諧婉懋官一等用示褒寵

王曦轉一官制

為差管押大理國進黃馬赴關

遠人進馬爾護其行來自嶺海有勞可序進官一等往其祇服可

劉植等轉一官制

勅某等朕網羅放失舊聞開解汪洋奧義垂詔萬世作為一經汝等各以精博之能與有編削之績成書來上嘉歎不忘俾進厥官以作爾寵

种師周等邊功特轉官制

勅具官某朕用兵西夏還師奏功凡共武服多所甄錄
爾增秩有差莫匪優恩尚圖忠報

程唐磨勘轉官制

在昔唐虞道宥天下而時稽庶績黜幽陟明文理密察
則以定治某官聯華從橐偃鎮鉅藩蓋寵顯矣而有司
所謹伐閱有考序遷維公國之典彝不可廢也

武克國邊功轉官制

勅某爾獲一虜而進官一等此國之厚恩異賞也不有

後效何以報稱

入內鄭惠轉官制

爾久事朕克謹誠德出入禁闥朝夕歷年其福當介於
神明有穀可詒於子孫比考成書之績肆推奕世之恩
往祇爾躬毋怠嗣訓可

河東採斫木植李宗等轉一官制

勅朕作新象魏臨蒞寰區曾是棟楹椽桷之材伐取巖
巖谿壑之秀嘉車航之沓至紛斧藻之並興逮此考成

可忘褒序爾等各揚厥職以濟斯功有勞可矜有績可錄咸增榮秩往服明恩可

提舉修建宣德樓張懷寶等轉官制

勅維時觀闕重國威靈既底新成不忘賞勞以爾克祗厥事用濟成功有嘉庸能俾進資秩欽承以報往惟懋哉可

孫珪重傷部三百人折外亡失二十五人轉四

官制

勅某官蓋聞行疑賞所以示厚也爾將士卒多所失亡而邊吏以爾重傷聞姑援賞秩庶觀來効可

著作郎劉間修建秘書有道德院管勾文字轉一

官制

朕觀羣倫而施化各附所安攬道德以為宗皆原於一用宏府寺肇建司存曾是作興稽考之煩屬爾疏明敏邵之助成勞既奏序績宜先茂進榮資於昭寵獎可

辛彥宗移修殿前司轉一官制

勅某官總提虎旅祇護龍墀壯厥攸司新茲庶宇克共是役既奏爾功懋以榮資往其承序可

潼川路提刑蒲卣修城轉官制

勅某官眷彼蜀道控于潼川董燕師以完城既新巖邑考盟府之藏典加責勞能爾鬱以時英遠揚使節懋建矗雲之固雄開歷井之觀擢以殊榮寵茲時敏

王貴修宣德樓了畢轉官制

勅爾等祇服役事作新端闡典賞既行勞能咸序遙總

兵團之重往增軍籍之華益慎攸司毋忘寵獎可

登璫等修完城都府倉庫營廟等畢轉官制

勅某官等成都之重實控巴蜀曾是府庫倉廩犴獄郵
傳營屯祠宮規摹未宏氣象無觀穿漏圯夷積不繕治
無以發錦江玉壘之勝而壯虎牙犴纛之威肆詔有司
作而新之民不告勞策不愆素則爾等與有勤焉疇庸
進秩國有彛典可

陳良弼為六朝寶訓書成及職事修舉可特轉

階官二等制

六聖明謨萬世祇若渾爾唐虞之典既奏冊書粲然河
洛之文永膺寶鎮肆錫寵褒之數大疇贊協之勞眷予
邁臣蔚有多績用因先訓並進榮資某官忠勤自將明
敏衆服周旋省禁密勿殿嚴內承詔令之傳外總事功
之衆朕所親倚人鮮儼儔蓋靡勞而不宣亦何紛而不
理懋極武階之峻式昭眷禮之隆往慎猷為益承周渥

徽猷閣直學士應安道轉官制

為平江措置開
濬江浦作田

勅眡功行賞國之典也比詔有司作治江浦庶盡地力
俾無遺利今以大田數萬頃奏使其名與實實則宜賞
與功稱某官爾守平江實總斯役夫吏舉其職則邦國
可富萬民可養百物可生凡古所謂事功之勞者無乃
在此懋進爾官用勸本務可

高公純轉官制

為河東保甲司
糧到斛斗備邊

勅四海之眷界于太行二寇之衝制在全晉屯兵於烽
堠宴清之日積粟於囷廩狼戾之時此國家鎮撫之至

權而使事經營之先務爾某官克奉詔旨遂寬顧憂儲
峙一方課最諸路其懋橫班之寵用增持節之華益念
報忠勿替祇敏可

鄒清轉遥郡制

夫以曼纓之士積橫戈之勞登于正使列在大夫蓋寵
榮矣至於遥領郡刺之重非有奇功國不轉授而爾以
累賞得之是謂異恩其可以思報矣

李宗為措置河東路採所木植除直秘閣制

勅圖書之府英雋所儲籍通其間世以為寵爾選于朝
著遣以使華能悉乃心以稱朕意陞聯延閣增貢輜車
益勵事功往祇眷倚可

孟昌齡復官制

禁從之臣恩禮所厚其負瑕玷每懷滌除某官夙有勞
能服在寵顯昭姦弗至詔累維公於稽典曩未應甄叙
朕嘉爾勤承業匪懈俾還故秩爰示殊私益圖事功是
維報稱

迪功郎上官宏邊功換授忠訓郎制

爾以賢為郎而邊臣奏功具名來請朕弗之逆也而改
爾之秩以從武列尚圖報効毋忝寵榮

劉仲武乞以管軍恩例與男鏜閣職制

武臣而隸職上閣蓋華選也爾父帥邊以汝來請朕弗
逆而授之往思祗慎求稱寵榮可

置勒幹斯結等制

爾能奮迹於蕃豪而効忠於帝室數當戎寇以佐邊兵

朕亦何愛于一官以慰爾向慕之心而勵爾勇悍之氣也蕃豪族姓天資純固一識忠義守不可移武悍驍果邊兵賴焉爾力戰既久寵階已高其膺郡刺之榮兼總戎轄之重往思力効以報異恩

勅孫珪等制

朕用兵西方嘉士大夫之積勤論多第功鮮不甄錄而爾與焉爾其無以施之為易而不思報也

勅王仲寧等制

軍政以誅大為威賞小為明此善志也朕覽邇奏第功
行賞而不汝遺焉庶幾明無不昭矣

勅趙進等制

振旅言還奏功沓至渙班爵秩敷錫恩榮爾與在軍膺
此差錄惟忠與勇往報所蒙

勅向世僖等制

寇盜之警時政所嚴捕討之功國典攸重有司言爾有
斬刈劇賊撫降羣醜之勞久未褒叙其不可以不圖矣

秦湛修道史制

朕緬懷高真風槩可考詔修信史傳載厥遺必擢國華
俾贊編削以爾文學英博克自發聞秩之以官服在茲
選寵渥之異士類所矜其往欽承以副褒勵

欽定四庫全書

襄陵文集卷二

宋 許翰 撰

制

占城國進奉使蒲畢率等加官制

朕承列聖之丕圖撫重熙之昌運際天所覆奉國稱臣
爾等起於遐方服我至化占風雲于律呂知中國之可
朝絕山海於梯航奉遠珍而來貢觀光有慶率禮無違
嘉斯純固之誠被以光華之袂往欽寵數歸榮異邦

蕃官謝邁格等制

爾等躬率種族為國捍邊元戎奏功屢進厥秩今茲論
賞復加厚焉尚識殊恩徃思効績可

勅鄒子崇制

朕念遐陬務推遠德揚威闢國據有要荒保險成城綏
靖疆場克濟作興之役有嘉轉漕之勞逮此奏功不愆
素策宜增爾秩以勸協恭

勅李佐等制

夫出陷堅銳而入受寵褒此壯士從軍之志亦盛時治
邊之法也爾等名在捷奏事當賞典各增榮秩以勵遠
猷

策凌結夫人制

邊圉之俗寇戎有警則雖家人婦子皆能攝弓而馳爾
某人任子種族以錫命于朝廷蓋亦寵矣其佐家策勲
為國捍敵慕古馮洗忠義一心

呂仙翁封妙通真人制

邠州栖
真觀

朕嘉與斯民偕之大道凡茲仙隱有冊載書司存來祈
寵褒必下某人匿景藏采遠跡遐方逮建福庭適當爰
舍歎茲符契錫以號名神其不忘尚監休渥

趙忠經畫偽洪夏軍推賞制

爾從功偽洪夏軍無所斬獲因師奏功而蒙賞焉其服
異渥往思後圖可

閻政制

凡樂道在朝廷而器使在有司董夫製作必有所屬爾

久以敏強總提庶工樂事告成宜有褒勵兵團使指是
惟異恩往祇厥官懋承寵渥

宋知本制

服膺素業委質高真宜簡厥修以勵于衆與茲列職秩
在殊庭各裡乃心往輔予化

何貴制

在易之師曰左次無咎未失常也夫能提軍深踐戎境
而無所失忘是亦有功矣可

蔣猷等禮制局討論親耕親蠶典禮重修鹵簿
成書推恩制

三王臣主俱賢治符天造六經禮樂為急化在人為朕
躬攬羣英藻拂庶事肇稱墜典勅備盛儀庶幾緝熙比
隆古昔厥惟雋德克右丕圖某官節高搢紳名重朝著
詩書砥礪于素業議論經濟乎衆宜錯事有年成書屢
奏芝車載耒上應農祥鞠服繅盆下登繭稅一正旗鑾
之衛更知皇帝之尊文物粲然昭膺至此雖從橐文昌

之貴功不自言而盟府冊封之公賞安可廢往增崇
秩用稱褒嘉

民有儀則自天秩之保神國之經綸因人情而興物故
禮樂有所定著則風俗與之推移朕觀萬化之原發彼
至理接千歲之統飭以彌文期商周之比隆度漢唐而
不錄嘉與綿寓共茲極功乃眷贊襄不忘褒厲某官剛
大靜重宏遠邃深涵養詩書粹于德器雍容表著肅然
典刑多士克生是乃周家之慶君子有穀豈繫魯國之

宜蔚為世臣望于時雋折中羣議躋登丕彛其仍秘殿
之華徃冠近班之選並增崇秩用示殊恩懋爾猷為永
斯譽處

道者萬物之奧唯聖人有以開明禮者皇極之門待盛
時而後興起朕總攬英俊圖回治功不敢遑寧凡以為
此眷我祖宗之積德奚翅百年宜俾國家之鴻名首稱
萬世是興文物以被寰區乃惟爾能有相朕志某官經
仁緯義轉古切今方覽輝於隆昌以撫壯而超詣凡績

之事必底于勲屬憲度之彌文多討論之是正若予元老
惟國師臣社惠無彊匪直大功之數十纂修勿替遂成
曲禮之三千克嗣先猷惟爾敏德蓋父子世濟而咸懿
君臣體一而相成往冠從班懋增清秩恩榮至寵褒勵
惟公

唐恪等勅令所進明堂大饗視朝頒朔布政儀範
成書制

勅朕規摹禮經考宮以合五室本原詩頌式典以靖四

方月視吉朝歲修親饗荷帝暉之降格撫天運於隆平
制為金玉條理之文備著天人統和之節眷言編削嘉
爾討論具官某等褒然雋良服在禁從董茲大法蔚有
成勞理事咸章文辭並飾策書奏御莫匪遠猷明典疇
庸不無近比懋進高華之秩往膺褒勵之榮可

勅史徽等制

明堂之頌曰儀式刑文王之典日靖四方夫刑必因典
而生而典常待刑以成是以唐虞之世伯夷降典折民

惟刑明其一體不可離也今朕肇建合宮咸秩墜典而有司勅令格式之書具焉刑而成之也嘉爾討論相與文物懋官序績用示寵褒

修龍德太乙宮及紫宸垂拱文德等殿官吏有勞觀察使康弼等制

勅朕外建殊庭以承天寵內嚴祕殿以重國威輪奐攸資工技並飭董凡役事屬我適臣體環極之光明用宏茲責考斯干之嘉喜無彊惟休屢奏成功可忘褒序某

官器能宏達思術精深進承清穆於燕閒退總繕修於
宗構蟠根錯節咸蒙斧藻之容璇題玉英坐改神奇之
觀粲然百度興于厯年宜懋進於榮資用寵光其庶績
往惟祇慎永保恩華可

勅上棟下宇重門擊柝皆神明通於易象而法度著於
禮經朕之作室考宮本原無乃在此不蕩于巧不侈于
費其維體國是以靖民某官久以敏材膺茲煩使董振
庶役祇若予工肆用旌爾之勞而訓爾以度徃思褒勵

自壽寵榮可

朕外建殊庭內嚴秘殿屬凡役事越有能臣屢奏成功
可忘褒序以爾服在禁密具見才良進承清穆於燕閒
退董繕修於崇構粲然百度興于厯年宜懋進於榮資
用寵光其庶績徃維祇慎永保恩榮可

勅蘇佚等制

役事有嚴成勞屢奏渙班爵秩褒屬庸能勿懈爾勤往
承厥序可

勅康份等制

庶工偕作咸精其能華構屢成不愆于素肆推典賞用
慰積勤以爾材術自將事功必濟嘉茲多績勵以榮資
往祇厥官益圖其稱可

勅耿申之等制

接高真於福庭朝羣工於秘殿翼然華構飾此盛容乃
眷作新之功用錫寵褒之數以爾強力匪懈奉令弗渝
久以材猷懋膺器使成勞屢奏庶績有嘉爵秩彌榮臣

工是勸可

馮躬厚等禮制局推恩制

學士大夫明乎先聖之道修之於家而際會休明作興禮樂躬與論撰發舒所懷其必有以樂乎此矣策名增秩可謂至榮往祗厥官益勤乃事禮樂之文載籍雖缺討論有定制作可觀某官久以材猷與茲典策其懋遷於榮秩以褒勵於成勞

王瑜施行等為建築縣寨推恩制

卷二
朕聞夔道西南荒山曠林綿亘相屬日者吏建以為可
城而有益廣王畧使蠻日蹙思州之役亦既告成凡與
有勞咸使差錄被之寵秩以新邊圉之觀可

冬祀赦崔貴妃曾祖贈太傅制

勅爾從千騎萬乘之嚴威奉四海九州之嘉薦受休太
室謁款清壇彩仗淵回恩書汗渙曾是寰區之遠咸被
蕃釐豈繫房掖之先可忘褒序某官肇開華緒夙厲素
風雖功德陰積而難知絲福祿豐興而可見確乎若華

嵩之有麓幽然如江漢之初源深固可存遠大無盡廟
食百世位間三公其膺錫命之新永作神明之佑可

曾祖母贈燕國夫人制

福生有基匪茲一日之積禮得其報至于三公之隆美
在閨門榮生邦國豈非羣情之至愿是亦逢辰之極休
某氏誠明在躬俊良是匹眷儀刑之既遠家法尚存撫
慶澤以如新風流未泯屬受釐于泰疇肆䟽壤于燕山
用侈爾封益昭厥德可

祖贈太傅制

朕揚鴻烈而章緝熙定宗祈之大典剖神符而合靈券
受蕃祉於廣庭撫民力之普存灼天心而可見慶澤之
下無遠不蒙錫命所加有幽必格某官受天粹氣為國
良臣逮事祖宗克共省闈宜被神明之眷祐流為裔胄
之光華鍾此聞孫蔚為近輔極褒嘉之殊禮著積累之
深仁位間公師名光綸綍不亡之壽服我寵靈可

加贈太師制

蜀莊之貞撝不改顧隨和何以加諸于公之陰德既多
知子孫必有興者思古人而莫見諒天道之猶存其數
渙號之榮以發幽光之閔某官躬保良貴心渾太初雖
高位榮名不奮揚於既往而流光餘慶終焜耀於方來
克有閨孫作我碩媛追崇顯號擢在宗公宜申錫於天
姻俾益膺於帝祉若稽有典詣極維垣英爽不忘欲承
無數可

祖母贈楚國夫人制

報本反始莫重禮經愛親明賢是惟政幹朕既明裡郊
廟敷佑海邦念本始而不忘人誰無此惟親賢而加厚
物適有宜某氏以雞鳴警戒之誠居鵲巢積累之業是
興家室以遺子孫霽慶譽之未央知蒸嘗之不輟表茲
南海侈爾新封尚英爽于神明克欽承于寵渥可

父贈太師制

朕承正日之履端奉三年之大報秬鬯泔淡宗廟顧懷
璧玉光華壇時昭格函蒙諸福敷錫多方眷言懿戚之

英彌茂寵光之數某官純心復古素履發祥鴻漸昌時
鳳騫近著是生碩媛來輔皇家環珮有儀自秀宮庭而
肅肅弓韜多慶方興弟子之振振宜受閔休以侈華緒
是用袞衣繡紱進爾於上公鈿軸錦囊錫爾以光訓聯
榮三世想慰九原可

嫡母贈魏國夫人制

自晉興王必有內輔承寧福履化正羣倫故元妃之在
官應四星於天象如三公之論道並列職于周官受寵

既隆介福宜厚推原厥慶豈無陟屺之懷欲報斯勤每
動縫衣之感凡茲懿典莫匪緣情爾某氏溫慈之祥惠
迪之吉配彼君子宜于室家克生山河之英來居日月
之際翟衣瑤珮早為宮掖之表儀繡悅雕弧方受子孫
之蕃祉屬茲大報多錫鴻恩肆侈邦封俾榮廟祀尚欽
承于綸綍以永佑于雲來可

繼母封魯國太夫人制

雷雨作解無遠不蒙蘭桂有芳雖幽必發矧我邦家之

媛獲依日月之華實相朕躬以承天則屬熙成于祀事
既慶洽于寰區眷彼親闈蔚然懿範宜因譽處彌錫寵
榮某氏稟德純深率履共靖雍容房闈儀刑族姻在中
之賢可貽彤管奉先之職無媿采蘋當躬被于恩華俾
日隆于壽祉肆啓龜蒙之域用新湯沐之封徃服褒康
以樂榮養可

大禮封贈王曦曾祖追封揚楚國公贈太師制
勅朕明禋泰時祇見皇天發號端闈慶賜寰海凡是通

籍而上皆得追秩其先矧惟輔臣蔚有世德可不丕崇
於盛典使之增賁於流光某官素履無華勞謙不競聽
神明之所介啓慶自躬撫爵祿而弗居收功厥後封兼
揚楚位極公師雖寵數不可以復加而申命用昭其無
斁永懷冥漠尚克欽承可

封贈曾祖母贈揚楚國夫人制

朕躬推烈祖配祀昊天神明顧懷福祿昭假以為不忘
其本追崇其先當示一體于君臣之間宜加斯心于朝

廷之上使凡二府之貴獲申三世之榮咸秩室家伊匹
休寵某氏承光慶緒來嬪德人閨門儀刑族姻師象滋
祥興行于嗣子蕃釐被及于曾孫遂兼二國之封以作
九原之寵其欽申命用慰潛靈可

祖贈太師進封秦魏國公制

大夫尊祖不無追遠之恭君子抱孫亦有同昭之重人
情所至禮文是生故當裔胄之下興必假寵光而上介
維時碩輔相朕精禋宜受神休以侈前烈某官撫躬盛

世為時望人將昌明而尚艱既高厚而猶積弗大震顯
于往用鍾祉福于茲功德不忘共識徐公之子風流相
繼莫如謝氏之家乃眷元勲實賜故業賜衮衣繡恨復
無官以酬荒魏興秦亦何適封之有尚膺光訓以曜幽
宮可

祖母贈鎮益國夫人制

人孰無孝恭尊祖之心惟貴者得極其寵國固有爵祿
馭臣之柄惟賢者得遂其榮眷子元勲之家宜崇奕世

之德共離帝社以侈邦榮某氏毓粹幽閒配良碩大蘋
繁蕙藻承祀孔時榛栗棗修有儀可象天錫子孫之盛
世扶宗社之隆巍然公輔之相望鬱有寵休之交薦追
封二國告慶九原沒尚有知誰云不享可

祖母贈秦魏國夫人制

朕舉承天之盛典相維辟公荷上天之隆康錫茲祉福
曾是君臣之相得宜與國家而並隆其申錫于徽章俾
增華于廟祀某氏祗祓于德紹興厥家和穆之賢可著

彤史明昌之慶是興元勲慈祥流入于化鈞恩勤轉至
于綿宇間孫繼起康祚彌新配位公師賜履秦魏粲然
光訓紆此眷懷不專為恩國自有體尚克膺于靈寵以
永佑于神明可

母贈徐魯國夫人制

記有之曰祭者澤之大者也是故上有大澤則惠必及
下廟之有餽每變以衆興施惠之象以觀政焉祖宗故
業三歲一郊則慶賜六軍恩宥萬邦推廟餽之惠術為

郊禋之熙事蓋象兆于古天而烈鴻于今日可謂至矣
朕既尊祖配天為民蒙福顧左右輔弼齊明盛服實相
祀事宜有昭天漏泉之澤慰其報本反始之心某氏稟
德大家求嬪盛德以柔恭盡婦道以齊莊成母儀積慶
躬心歸功夫子爰圖斯寵用報厥勤既䟽彭門遂荒曲
阜光明碩大以撫爾封神其來沐尚克享哉可

大禮封贈曾祖母贈衛國夫人制

禮成受福鴻恩下逮于萬方仁以率親寵數上崇于三

世此君臣千載之契蓋家國並隆之辰某氏擢秀閨門
作配君子族姻是式聲塵未亡慶有深源諒流光之無
盡德推殖本知末茂之可期是興曾孫為時碩輔侈封
大國均秩宗公尚服寵休以慰綿邈可

祖母贈華國夫人制

大治榮華既舉成天之典鴻恩普洽更昭饗帝之祺迺
眷邇臣實共丕烈有論道經邦之懿密贊機衡有展案
錯事之勤顯相郊廟錫以慶闕之胙慰其尊祖之心某

氏房閨表儀副珈師象采蘋之奉燕及祖宗凱風之勤
惠于孫子積善有衍厥家用興紆明綸于中宸進華封
于大國其欽寵數以耀幽墟可

故母贈徐國夫人制

朕祀帝于郊為民蒙福海宇咸遂萬邦遙竦而承流天
門大開百神並聘而臨饗還衡彩衛發號端闈德昭昊
穹澤洞泉壤某氏興自令族歸于大家僮僮婦道之嚴
簡簡母儀之重宜收委祉以極追榮肆緣熙事之成更

啓新豐之大配視秩于五嶽何以加諸耀恩綸于九原
為不亡矣尚歆異數以慰永懷可

母封冀國太夫人制

朕飲露英以潔誠神保來格奉玉精而奠禮祀事孔明
委瑞如山流澤漸海眷言公衮慶屬慈闈宜紆綸綍之
華以錫郊宮之祚某氏稟生冲靖毓德沉詳憲前修于
繪圖襲遺芳于彤史有采繁率職之孝可繼周人有斷
織勸學之明無愧孟氏克輔賢嗣發聞盛時撫躬紫宸

致位黃閣凡厥忠言嘉謀之入告必為陰功隱德之流
行介福于神歸壽其母是新大國益佐高明其茂進于
爾封以丕承于朕命可

妻封徐國夫人制

朕克共丕彞有嚴大報於穆清廟致精物于一純爰熙
紫壇聳神光之三燭恩施綿宇福被羣生用申錫于明
綸以侈封于巨室某氏克生華緒來嬪慶閱修副笄珩
珮之容燕安不隋率蘋蘩蕝藻之職祗慄無違躬佑乃

夫時升朕弼朝修夕省前輝後光逮此熙成賴此顯相疏
封大國蔚為輦悅之華配位宗臣高參袞繡之貴往欽
休渥並壽寵榮可

蔡佃父贈太師制

朕恭承典祀大報郊丘惟是幾康以昭受上帝敘時祉
福用敷錫庶民矧在邇臣念彼嚴考豈無惠澤以極褒
榮某官奕世忠良累朝故老祇命匪懈提身罔愆雍容
禁閤之英密勿宸庭之重寵休彌厲事功則多迺茂庶

車之華始鴻素履之慶克有賢胄濟登昌期受國隆恩
為家永胙是用峻爾巖節冠于衮司德既流光共識臧孫
之有後幹能用譽非特懿子之無違尚歆寵靈以利世
嗣可

管軍周寧母贈碩人制

昊天降祉率土蒙仁帝輝旁燭于海陬王澤下洞於泉
壤某氏恪勤勵節克相其夫寵獎繁榮是維有子紆訓
詞于申錫昭祀事而熙成庶幾有知尚克來享可

工部侍郎柳庭俊妻封碩人制

在昔周召實分陝郊正自家人輔成王化眷朕邇聯之
室宜多可列之賢乃屬明禋咸錫嘉祉某氏不違于則
有相其良與分邦家之光以懋閨門之秀著其碩德比
于莊姜永念何修益稱斯寵可

孫琦贈五資制

師出熙河帥不反命將吏隨難伏節原野朕甚震悼不
忘于心某官深犯兵衝以墮虜計忠義不辱英明豈亡

躋爾橫班被以光訓尚克有享用慰九原可

直龍圖閣王序等除修撰制

更直圖書之秘論撰典冊之嚴蓋故事必用英才故歷
世以為華選舉斯名寵用賞事功所以慰其心而勸其
能可謂至矣廼者秋水方悍河鬻廣武爾等障禦有伐
可書列職遠清往報恩獎可

--	--	--	--	--	--	--	--

欽定四庫全書

襄陵文集卷三

宋 許翰 撰

誥

周與齡除凝神殿授經誥

朕惟層霄之間金簡玉籍衆真策名焉朕用制為榮秩
甄叙修能以爾久勤至教彌邃微言秘殿橫經懋膺殊
擢我冠盛服往率清流無怠精裡益承休寵

詔勅

廬山靈顯感應公勅

勅某神山川之神能以其威靈利澤網紀一方大慰民志則封爵加焉國之典也爾蓋自熙寧始以列侯受封其後進爵益號寵褒屢加朕嘉神能眷佑千里時節雨暘以濟登其歲功久茲不懈是用金璽盤綬王神於廟尚歆寵光勿替嘉德

武勝軍普潤廟嘉顯侯祈雨有應封崇應公勅
勅某神能以威靈利澤震聳一方而惠施其民則封

爵加焉國之典也今神進封至公過古四瀆所視可謂
盛矣尚其勤民務副一方祈嚮之意以稱名寵

冬祀贈故父宣教郎敕

勅朕制真館之榮名咸視治朝之列著敦以家庭之祚
慰其霜露之心天道攸存人心豈遠某官生不受祉沒
乃遭時有子誕興為予闡化屬熙成於懿祀遂申錫於
龍光靈其欽哉寵孰大此

綱朗凌等陣亡恩澤勅

國家用兵能使豪雋伏節於矢石創壽於旗幢而無顧
憂者知身有忠義之名可矜而家有勤恤之典可恃故
也今擢爾等充備官使族姍並寵以慰九原馬革之心
生為壯節豹皮之諒沒有榮名故伏波為漢功臣而彥
章稱梁驍將朕欲戰士之志咸懷古人之風肆於致命
之家每厚恤亡之典往膺殊渥其慰遺忠朕閔矜伏節
死難之士厚撫其孤恩施姍姍爰及爾功爾其永念爵
秩所從俛恤其家仰忠於國斯為知報體朕至懷

趙宗古等勅

戎醜不廷邊師深入破天豪原斬馘甚衆爾與奏功肆
加擢序往率種落為國藩籬朕懷闢羌戎控扼要害遐
荒萬里樓堞相望凡與事功罔不甄錄

蕃官張達勅

爾以拳勇之材忠勁之氣長雄部族首奮戎行幕府上
功朕所嘉賞紓此綸綍以焜耀爾躬於士馬之間可謂
榮矣益思立效以稱鴻私破堅拔敵奉國威靈念功簡

勞以類褒錄往膺榮秩思報優恩

蕃官王誦勅

從軍歸者鮮不蒙澤而爾云有獲焉賞之加厚以勸我功

蕃官成凌等勅

朕設爵秩序功錄能以公天下無間華戎而鎮蕃又加厚焉者所以旌慕用之純固而褒捍禦之積勞也往圖立效以報殊私

蕃官侯剛勅

息兵肆賞凡與有勞者皆缺望焉爾於勝負畧相當失
亡者多有增階秩以錄爾勞所以責後效也

納木哩遥郡轉官勅

夫以身奮起於荒陬戎落之間而論功薦名於黼黻之
前膺受寵渥高至遙紆郡紱下猶不失躡遷官秩其亦
可謂能矣若是而不能終以翦滅強敵盪洗絕域之奇
功報則非夫也疆陲振旅將吏第功秩遷公朝光震戎

落益圖異效往稱鴻私

趙青轉官勅

還師第賞爾之武勝未有章章可數也而躡遷爾官況復有奇勲可策者乎所以褒嘉將如何矣往其勉之自致寵顯

楚凌轉官勅

邊陲奏勞以次論賞爾屬未有奇功也而獲厚如此其帥種族往圖來報

張端回授勅

軍吏謝事擢序其子使嗣其祿以佚其老所以示國恩之無已也惟孝惟忠往圖報稱

牛萬等歸明授承信郎勅

畔而不討何以示威服而不柔何以示懷此春秋之善志也朕比用兵西夏而爾等震疊面內奔我明德秘於祿位被以恩榮往其欽承勵爾忠順

傳應法師張守真加通妙二字勅

勅某人蓋聞諸傳國家將興有神降之監其德也昔我
藝祖既定天下德輝上昭神保來格監我興運佑此丕
圖爾以名在玉籍精壹勤共裡祓為神據依永懷真風
申錫嘉號靈其未沫尚服寵休

隨龍輦官馬吉轉遙刺勅

奉輿衛之嚴在顧眄之近蒙恩宜厚疏寵用光其遙總
於郡符往增耀於軍籍尚其祗服勿替忠勤可

李裕轉遙團勅

古稱摘山煮海可使民不加賦而國用足今茶之利與
幹鹽等而爾能以強濟克佐厥長使商賈阜通歲収有
登焉不可以不勉也可

藍瑞等為措置脩閉堤岸有勞勅

勅某官等夫地之有溝洫猶天之有河漢疏通無盡皆
應自然而比年以來水衡少弛畿甸之間使水故道堙
塞圯壞豈天理哉爾等奉詔經畫不日告功載加勤庸
有茲擢序往其祇服是亦隆恩可

李誠陣亡恩澤勅

爾父從偏師度戎境弗獲返命國典所矜加恩諸孤以
慰隕往

親從都指揮使馬隱落權差充皇城四面巡檢
勅

勅朕象天閭闔重國威靈作新端門臨蒞區寓集官董
振度役濟登百工蔚有勞能確乎忠力其釋權於軍籍
往專席於使華祇護宮城懋膺寵任

宋珪等勅

鳩工偕作雉堞並興不日奏功有嘉忠力爾等與祇役
事具著庸能俾進榮資用昭寵典

張恕等勅

端闡之役爾與有勞秩以官榮示厥褒勵可

知丹州劉洪轉遙刺勅

勅爾殿藩維比膺詔旨遂使泉布一日復重流行千里
之間民不殆疑物無踴躍載覽報功之奏宜有過人之

能其仍總於州麾俾增榮於郡刺是昭異數往服明恩
可

梁震為管勾御膳局有勞轉遙團勅

勅某官等朕觀成周之盛羣公服采膳夫酒正各率其
屬列於天官以贊邦治夫一人之躬天下之治聽焉則
能董養羞鼎俎以奉一人之養者皆有功於治者也爾
等祇服禁嚴承業匪懈潔珍品庶率禮無違懋進厥官
用疇勤恪益共乃事往報恩榮可

王通勅

至化隆洽遠人豫附奉其實贄臻於闕廷曾是綏懷每
敦寵數有舍館委積之事有饗餼加勞之文所總實繁
非材莫濟具官某久以眷簡服在禁嚴屬荒服之咸賓
示鴻私而兼撫受命典領克諧蠻蜚朕嘉爾能詔增厥
秩往服恩榮之渥益勤圖報之衷

耿南仲贈故父勅

勅天人合符誕興嘉祉君臣一德濟登孝熙肆朕受休

於郊宮則必加惠於朝著推斯尊祖之義為被逮親之
榮某官履慶自躬流光於世克有胄嗣來翔禁途為時
碩儒輔朕元子經術至於其奧誠德可以為儀致是華
資莫非幹譽凡追崇於廟祀一無愧於綸言靈其歛哉
昨孰大此可

贈故母勅

禮大報天而主日配以月著陰陽之義焉是謂立天之
道朕受釐上帝錫命羣工即昭厥考亦右其妣使配廟

祀咸承天休某氏託躬大家來儀君子是膺間氣克生
名臣遂收追遠之榮以申罔極之報侈茲祉福慰爾憑
依可

李處勵等勅

改作之際政幾所慎朕比詔四方收斂祝髮之士為天
竺之學者而加冠巾焉爾等乃能宣諭至意綏靖羣心
令用不壅於千里之間靡然變服無所騷動朕甚嘉之
懋官一等以旌厥勤

莫琚勅

谿洞內附州處其民撫納經營爾在煩使以勞增秩用
示甄錄

折彥野等贈五資勅

師出熙河帥不反命將吏隨難伏節原野朕甚震悼不
忘於心深詔有司追榮將吏厚撫其孤以稱朕意庶幾
爾等英氣不忘顧懷無憾可

管軍周寧封贈故父勅

勅朕精裡昊宮慶賜綿宇眷言在列位至禁嚴圖顯其
親禮宜褒序某官夙膺器使備著勞能雖寵榮已被於
躬而慶澤更鍾其子是錫郊官之胙以為家廟之榮夾
世逢時存沒何憾可

繼母勅

朕祇見天帝慶賜海邦眷維禁衛之勤可忘褒序之典
肆推榮胙以逮親闈某氏託躬慶門來儀吉士克有世
嗣自著朝聯遂膺追遠之榮以申罔極之報侈茲祉福

慰爾憑依可

故妻勅

勅國家故事妻不追贈神宗皇帝垂仁在位矜式家之
積勤軫林墟之遺恨俾因郊胙咸被綸恩自是德周於
鬼神逮今澤漏於泉壤某氏獲依良人之寵與蒙封號
之榮靈尚有知其克祇享可

妻勅

惟禁從臣實佑相朕熙成祀事並受寵休而室家於此

不蒙則恩澤缺焉未洽肆推彛典咸使褒陞某氏褒然
房閭之賢應此絲綸之訓著其碩德比於莊姜永念何
修益稱斯寵可

趙進忠勅

夫身居軍服職而遙刺千里之郡蓋寵顯矣戎昭所矜
朕不輕授以爾有勇知方奉義震討奏功帥府進秩公
朝超此榮資是維異數往思懋勉以副褒嘉

胡誼勅

揖遜征誅古無二義雍容果毅比鮮兼資以爾出當矢
石於疆陞入贊等威於軒陛文無失則武有奏功既膺
新褒復典舊職是皆寵獎往惟懋哉

李抗勅

總戎敵愾上下同心還師奏功小大差錄爾能冒犯矢
石之險區薄風雨之勞勤歸疇庸咸有擢序尚圖忠報
以對恩榮

劉棟勅

勅某人朕欽崇天道祈進民心頃詔天下蒐採方聞志
介竒材隱德之士冀得其真而爾褒然來對便殿有異
聞焉朕甚嘉之顧賞錫以先生之號而辭不受今其所
去宜視厥秩以寵其行內聯延閣之華外總殊廷之秘
並為異數往服休榮

蕃官伊凌等勅

黠羌弗率興師震討渙爵班秩以勵有功爾等躬以長
技倚角醜敵天兵凱旋宜有褒序昔唐名將奮起於蕃

豪而策勲於史籍者多矣爾其往報恩榮思庶幾焉

房仕忠勅

武臣之職至於典領使事防患禦侮任綦重矣而爾以積勞疆陲有此擢序是維異數勉思報忠

王澤勅

邊陲有興爵賞隨之寵秩厚祿可以積勞致也元帥比數軍實第功于朝而爾有名焉推於兵團既寵以厚益思立効往稱異恩

葛彥實勅

勅某人樞臣奉辭邊兵告凱爾與有勞於其間不可以
不錄也

崔詩勅

勅某人朕簡服士大夫於甲兵思酌其勞不愛爵賞邊
書列功爾與有名進官一等以示褒勵

張德元等勅

邊書奏功爾等與焉增秩差錄往示褒嘉

燕瑛勅

勅某人朕儲中秘書於延閣以養天下之英才而吏能
因事為功自求寵獎者亦加此職以華其躬爾奉使遐
方能使嶺海之人為釋氏者順命變服無所震驚祇若
予意用錫榮名是維異數往思忠信以保光華

尹昭明勅

王師凱旋軍吏第賞雖云干戈轉戰廓清之力亦有羽書
期會典領之勞肆疇爾庸往服予寵

孟拳勅

朕分將帥深踐戎境城其要害鎮以師屯黠寇翔兵無
敢犯獵告功定賞用嘉爾勞往服恩榮勿忘勵翼

龍世延勅

戎事既藏衆勲咸策譬如千金之裘不止一狐之腋也
爾等承天之威以揚厲於醜虜而歸蒙此賞蓋與有力
乎師旅之間則寵光斯被矣

表

賀郊禮表

郊見上帝命施四方熙事備成鴻恩溥洽中賀臣聞高
宗思道商衷更興宣王任賢周亂可撥因時有造惟聖
其能定申命於顓蒼羣傾心於海寓此蓋伏遇皇帝陛
下誠贊天地孝通神明綏靖愁勞削平寇亂修精裡於
干戈之下遂格天庥霈德澤於巡狩之時不忘民隱臣
歎嬰衰疾阻奉齊明但慶三靈之功復開千歲之統

代謝賜厯日表

革極數而去故賁乘象以觀文協為成書誕頒明詔中
謝恭惟皇帝陛下上齊七政下式九圍湛羣雍於春祺
凝萬有於秋寶雖曰神明不測莫知帝力之生成至於
祇翼有為必謹天時之先後迎推秘厯分錫遠臣敢不
寅奉聖謨罔愆使指日成月要警吏治以導繩東作西
平省農勤而敦務庶單綿薄少助鴻明

代謝厯日表

履端歸餘是詔叙事發祥隕祉用協彞倫中謝恭惟皇

帝陛下至通神明大配天地坐至千歲之日以為四方
之綱溥彼要荒受茲正朔顧臣既愚且賤亦云有社與
民曲被匪頒孤奉靈寵但勤日月之凡要難酌雨露之
生成

賀今上皇帝即位表

歷數在躬謳歌有屬神明其位宗社再安恭惟皇帝陛
下大明昭於四方神武服於萬物輕輅赴敵天地感其
精誠秉鉞誓師夷狄服其英氣方清亂紀永紹丕圖大

化鴻恩見太平之有象珍光醇耀知昌祚之無疆

謝脩哲宗寶訓成書轉官回授表

史奏成書名不參於後列寵疏茂典恩尚錄於前勞翰
動玉宸光流節屋臣中謝竊以天扶景祚世有聖明言
如六經誦於四海紬彤墀之記注儲延閣之典謨蓋自
歷朝具有故事惟泰陵之御極紹寧考之圖休澹然天
淵之藏發為金玉之振是修大訓用詔萬年而臣以備
官繆分汗簡但仰蕩蕩巍巍之盛莫知灝灝噩噩之宜

僅於六七年與定二三策弗圖序績亦至薄躬此蓋伏
遇皇帝陛下孝弟通乎神明化育參乎天地克篤保邦
之慶方重奕世之光傳重典章嚴恭宗廟不愛褒嘉之
數以旌編削之臣顧雖引疾而離朝猶使蒙榮於哀緒
條章釐舉莫窺微婉於獲麟利澤衡加端愧支離之受
粟

賀獲方賊表

豕孚躑躅警彼隅方虎虓振嶽興我戎旅即倬首惡歸

正邦刑臣中賀臣聞威克安強蓋道德所有冠為姦宄
雖堯舜不無其惟積厚而時康自將奸宄而力屈何攻
不拔何討不平恭惟皇帝陛下紆軫生民遵揚聖統詔
音寬大坐使壞植而散羣廟算沈潛迄觀執訊而獲醜
屋廬底定江山穆清臣迹伏衡門名塵從橐羽書薄遽
曾微一策之陳黼宸慶成不在千官之例徒欣遲暮永
託昇平

謝除待制表

官辭事任猶賦祿於祠官身去朝行尚蒙榮於從橐鴻恩無量元造難名臣中謝伏念臣少也讀書不無心於進取晚而信道亦有意於施為撫辰休明致位寵顯而孤危之衷未効則衰疾之勢已侵內抱潰魚之憂外支槁木之悴每追參於時儔輒愧忤於古人不謀引分以小休將致羣言之交謫既蒙全度更冒頻繁此蓋伏遇皇帝陛下道隆黃虞勲格蒼昊撫豐年於姑射使物無疵御廣樂於洞庭令人難老至茲鞅掌之役亦適逍遙

之遊臣敢不祇祓真修謳歌聖治尋共公遂初之賦聊
以窮年續宣王考牧之詩猶云報國

謝除資政殿學士官祠表

鞠躬避位議不震於明廷裡服奉祠職尚聯於秘殿蒙
恩過望銜感何言中謝伏念臣身事四朝志窮一節頗
闕易象春秋之遽欲明道數治亂之原老矣何施楊然
難用三以倉皇而去國皆由迂濶以干時逮聖武之勃
興叅羣英而迅召冀據淺陋得佐艱虞顧忠力之未陳

已衰疾而難強自傷奇薄不副登崇敢云酌損之時更
冒褒嘉之福徘徊聖念形為恩禮之繁隱閔情顏歎失
功名之會銘心莫報雪涕無從此蓋伏遇皇帝陛下道
德祲微神明基祚方收雋乂往濟經綸謂葉公好畫而
致真龍取燕昭市骨而來駿馬故寵光於一介以風示
於多方臣敢不思効涓塵懷忠狀畝續訪落之頌庶冊
書永燦於王勲反招隱之詩使草莽咸知於帝力

謝再任宮祠表

賓靈圉於閒館可考暮年選巫咸以叫閭復紆俞旨服
休則舊加惠維新臣中謝伏念臣志介弗通學孤無法
自勤郡縣汔侍軒墀終乏國能可補時事青天不盡知
倦鳥之宜還滄海難窮信潛魚之永逝活身以祿報國
何功此蓋伏遇皇帝陛下治盛唐虞化叅天地明清在
位敷佑多方卓犖紆餘罷羣材而弗棄蕃滋零落陶庶
彙於無私如臣之微亦得其所茂陵多病慚無封禪之
書華封何知徒有富壽之祝

謝再任宮祠表


寬疾歷年顧何功於祿次犯嚴再瀆迺復累於官施媿
集無顏感深至骨臣中謝伏念臣器難大受命亦數奇
一去丹墀三易草木儲藥石而輔老散竹素以忘憂臨
渚濯纓盡清時之惠澤負暘晞髮皆化國之恩輝未損
此生無非帝力刈滋蘭之九畹沆乏脩能晚自酒之一
盛尚茲貪得干祈曲遂閑散獲安此蓋伏遇皇帝陛下
陶養無方感通不測念茲一介曾辱侍於清光俾與羣

生各遂宜於至分隆施遐濶大惠累仍方士術家知頽
齡之可濟道人野老慶同社之重留臣敢不三祝堯仁
九歌舜治賦好雨知時之作已心化於農疇識薰風解
愠之音但夢遊於帝所

亳州到任謝追錄表

賜對於園城之中定計於割地之後豈珪璋之特達夙
誤簡知若松柏之孤生初何倚附自擢登於言路逮參
與於政機樂廣任誠初無心於適莫傳咸偏亮不委已

以浮沈但挈甌之智易窮而負薪之憂彌積時方多故
每虞辭位之難試以罔功空歎避賢之晚尚賴慈祥之
全度以釋重負於兢危



欽定四庫全書

集部

襄陵文集卷

四至
六

詳校官庶吉士臣陳若霖

侍讀臣孫球覆勘

謄錄監生臣松承羣

謄錄貢生臣吳壽康

謄錄監生臣張曾壇

欽定四庫全書

襄陵文集卷四

宋 許翰 撰

表

謝賜金帶表

臣某言伏蒙聖恩特降中使賜臣毬路笏頭金帶一條
者白髮墮顛方誤錫環之召黃金橫帶遽膺在笥之珍
補報何功褒嘉惟媿中謝伏念臣受材固陋涉世艱虞
書子張之紳志弗忘於素學帶啟期之索分將老於畸

窮豈謂哀齡尚叨異數此蓋伏遇皇帝陛下自天錫羨
為國宣光視繫維之至恩勵來修於孤節有嘉命服亦
粲精鏐束以立朝豈足言於賓客垂而有厲徒炫寵於
都人

代賀五星循軌表

霄極發祥璣衡效異動天以德惟聖其能中賀臣聞三
辰有經五星為緯候儀所謹軌道難常維見伏疾遲乘
諸至變故僭差凌轢易以殊方數應昌期歲書澄晷此

皇帝陛下上奉一元下開衆正賢能式叙法度誕彰格
彼彛倫占于景緯太平無象固蕩蕩以難名珍錫有符
但昭昭而應感是宜製聲詩以薦郊廟豈特垂光曜而
載冊書臣叨奉藩輶阻陪廟著邦家之慶臣子維均

賀撫定燕山府表

觀兵涿鹿果入南陲弭節盧龍遂荒北口汜如聖策有
此駿功中賀竊以幽薊之山川曾是聖賢之都域一從
陷寇幾老餘民至仁興哀偏師問罪連城爭下折矢無

遺掃絳帛之旗妖氛既淨訪黃金之館陳跡故存豈特
歷代之所經營而不能亦我七廟之所相望而未見茲
蓋伏遇皇帝陛下同符天地增輝祖宗能回晷輿暗昧
於光明皆自神靈威武之變化臣獨居懷古屢感遺謀
夫何將老之年覩此非常之慶

代賀復湟州表

車徒千乘啟周宣六月之征千羽兩階兆虞舜七旬之
格成功遽奏振古所無中賀竊惟河隴之隩區故稟漢唐

之正朔列為要郡實控諸戎末世舉而棄捐詩人為之
悼惜逮盛時之遠有極殊裔以咸賓弗思威德之加尚
為畔服之計負其襲險速我大誅謨既定於神明數自
屈於羣醜金鼓所響壺鞮並迎英聲震乎玉關勝氣凌
於葱嶺坐使長歌之壯士馳思萬里之封侯此蓋伏遇
皇帝陛下文昭誕敷武克耆定念先烈之未卒哀遠服
之弗蒙拯于幽荒覆以懿鑠四夷震疊爭奉國以欽承
二后顧懷想在天之昭假臣屬持詔節阻奉壽觴延望

闕庭曷勝忭頌

代賀平湖南北表二首

剽輕竊發犯我芻蕘嚴翼維揚震于區洛捷書紹至殊
黨交歸中賀竊以德盛者建功深世隆而經業遠肆熙寧
之更造奄荒忽以咸賓坐俾介鱗之區化為冠帶之國
五谿之服三世于茲豈無首豪恃險而不寧終以類醜
蒙仁而難變故茲討定不假殘夷禱馬禡牙已見星狼
之暗壺漿簞食爭迎銅虎之嚴山川益清郡縣寧久此

蓋伏遇皇帝陛下遵丕天之大律極寧考之圖功六師
時行萬里風偃皆神靈威武之所變化使習與闇昧得
耀光明臣遠奉使條阻參班賀聲猷所暨抃蹈惟均
獲匪其醜解辦自新震于其隣傳檄爭下薦功廟祐流慶
戎陬中賀竊以荆楚之荒谿峒如繡自古好亂厯世難賓
逮我裕陵底寧絕域取其險要為我藩維制屋廬以作
邦襲衣裳而受吏夫何忽造非彝卒蒙一矢之加爰興
肆伐大正九谿之戾申嚴約束易置渠豪荒穢滌除載

益山川之勝沴氛彌伏普瞻日月之臨王錫有嘉天威
匪紹此蓋伏遇皇帝陛下纘承考翼揚厲戎昭鼓之以神
故聰明睿智而不殺體諸有昊方徧覆包函而無殊坐
格幽荒咸歸震疊臣遠叨鎮守與被聲光舍爵策勲不
在干戈之列奉觴上壽莫參劒佩之趨自媿奚施唯知
竊忤

謝轉官加食邑表

山林閱歲何旦伐之可書宸極疏恩蓋無微而不錄榮

然加典被此薄躬顏汗訓辭心馳象魏中謝伏念臣受才瑣陋遭世昌隆冒昧寵榮超踰分願差肩從橐無追參英妙之能鼓腹祠房有空食廩庾之媿敢期惠論弗廢叙遷此葢伏遇皇帝陛下覆燾多方明清在位顧田閭之僻遠曾不間於軒墀譬草木之萌生使均蒙於雨露至茲哀病猶在記憐從父老於嬉戲遊遨誰識彌陶於至化率子弟以忠信孝悌亦云圖報於鴻鈞

天申節賀疏

昌期既協五百歲而聖人生大業方隆四三王而天下
治共仰睟鈞之造是興震風之祥伏願皇帝陛下神勞
艱難天佑平格坐鎮蠻夷猾夏之變咸服堯舜垂衣之
仁春非我春徧羣黎而蒙德朔而又朔歌億萬於斯年

天寧節進疏

日暈祥華見珍符之有啟玉晨昭格介第祿以來崇凡
厥有生咸知申祝伏願皇帝陛下斂膺諸福敷佑羣倫
撫明昌以御時維新厥德居隆平而保極於萬斯年

劄子

論配享劄子

伏覲手詔推原治本褒王文公進封王爵某竊以為文公既王則於學宮理不可復居顏孟之下謂宜自為一代之宗師專居別室以稱聖上所以錫命寵嘉之意而建立揚子貌像使得位次孟子配食祀典維揚子起於經術殘缺衆說紛紜世故危厲之時而躬保此道攘闢塞路維持正教開明聖法蓋與孟子異世而同功揚子

加難焉今孟子已蒙聖朝褒顯若此而揚子猶與漢唐章句之儒雜然列於廊廡之間誠因此時擢之使得比於孟子則聖道之傳昭然有統入學宮者望而可知邪說異端莫得而間天下幸甚萬世幸甚

論御筆手詔不由三省而下者取旨方行劄子臣聞天下之法當與天下共之有司守之以死雖天子不得而私也而後天下之大公立比年以來有司阿意撓法以徇一時是以條約文具而不守伏願陛下明詔

內外今後指揮若有害事病民違戾條制並令有司具析執奏御筆手詔不由三省而下者官司被受審復取旨乃得施行必使法嚴信如四時而後令一而民定可以立政矣取進止

辭免尚書右丞劄

臣今月六日准尚書省劄子奉聖旨除尚書右丞者聞命非常撫躬自失伏念臣才資謏薄命數竒屯寇難以來心形懼悴視已昏翳動輒悸驚雖欲自強必難勝事

然臣比自謫籍恭被召旨即日夜詣不敢少安者實以
國家近離變故仁聖新嗣厯服臣子之心未展願一入
見清光則退即山林沒身無恨弗圖恩獎遽委事機冒
昧非宜顛隳不測既妨賢路必動羣言伏望聖慈收還
成命

薦士劄子

右臣伏見朝奉郎李格從事不苟容論道不苟合隱居
宜春長沙之間以左氏學治春秋能守師法如漢儒蕭

然一室著書忘老又宣義郎羅孝芬外和中剛篤志好學其人早中甲科自可超取顯美而退居岳州平江安貧事親勤約自守鄉閭師其孝行搢紳服其名節又文林郎貴州書記林勲為周官學著井田書釐舉法義旁達權宜其言守經據古皆可施行于今飭躬守道久未試用累年避地轉走湖廣於流離中得此三人者可肅朝綱可厲士節可扶民極願賜召擢今係應詔同罪保舉

再論乞用种師道劄子

臣聞耕當問奴織當問婢老馬識道巢鳥知風此言物
各有所習也是以金草之事必咨宿將臣累言种師道
智慮未衰邊陲素畏藉其威名猶可折衝今縱未能置
之樞府謂宜使之領制置司示不閒廢俾得盡心虎豹
在山藜藿不採非虛語也臣既論兵之不可不用故遂
論將不憚喋喋上瀆聖聰者誠以為兵待將而後勝又
謂方多故時國之虎臣未宜投閒急而求之非所以明

朝廷也今寇行已遠遣議三鎮之使尚未發軔臣恐將帥牽制使指曠日持久遂失事機今日之勢當如救火不得少緩緩則無及望先明告將帥使得閫外便宜制勝委任而責成功此自古用將之法也兵交使在其間盟亦何害且料兵威未振敵情未驚遣使禮請未易下也故今日之事恃兵之力多而恃使之謀少乃可為矣
取進止

乞出第一劄子

臣聞祖宗之時在位清明公卿大臣以禮進退天下化
之人務自重各以守道為貴不以持祿為榮是以朝著
尊崇而國體安固比年以來此俗日替大臣保位而重
去小臣鬬利而逐爭小大相傾上下交疑非希旨取合
不進非迂旨得譴不退故公卿不矜名節而士庶無所
法象朝著日穢國體日輕姦諛糾紛遂以大亂孔子有
言為國以禮按今觀之豈云不信臣蒙聖恩寵遇至渥
維是才術淺陋不經時變少而多疾晚益易衰又以新

遭兵亂脫命毫釐心氣震悸至今未寧黽勉圖慮不能
精審奏事之際多所遺忘此當去位理在不疑若必竢
上得譴於君父下取謗於人言顛隳而去名節並毀則
與近世貪利之臣不顧廉恥無復小異上累國體下傷
風化新政之始所繫非輕伏望聖慈哀臣不逮許解政
機除一宮祠以安愚分使四方皆知朝廷之上始有雍
容以禮去者祖宗故事復見今日則是臣進雖無補於
國事退猶不辱於朝倫他時不死心力粗復別有任使

尚甘糜捐臣不勝感恩涕戀冒威請命取進止

繳趙畿詞頭劄子

右臣今日承中書省兵房送到詞頭一道為趙畿化諭夷人并趙隆趙吉頓習禮義等各特與轉一官事臣聞大而化之者聖人之事也是以聖王在上則詩無諸侯之風盛德所格殊俗惟新並邊蠻夷曠然服化此皆陛下神明威武之所感移不得不爾一趙畿者何人乃敢以為己力臣竊觀畿所申狀輒言以副知郡丁寧教

戒之心又有自知郡到任除去夷風等語使人誠有此意而畿恬有其言以聞朝廷則是不專歸德于上臣禮不恭使人本無此意而畿誅使之言則是便文為姦欺罔朝廷罪益大矣二者無一可夫人君體道以兼容人臣守法而盡察古之義也今朝廷示以德信覽其奏則捐一官而與之其事至微然臣竊恐夔峽一路靡然效畿所為謂國賞之可徼忘天功之難僭則陶冶殊俗之美不在陛下而在守臣此非所以聞四夷載史冊也非

諸侯無風之義也是以不可不論且使今日畿已受賞則他日身至朝廷必將援以為功干祈擢用叨取恩榮人臣不得而追論矣至此則四方聞之必有動心者長鄙倍之風害謹信之化所慮豈止夔峽一路而已其涓易防其萌易折誠使幾微必察自然國體皆正除趙畿等轉官臣已草詞外所有趙畿轉官詞頭未敢具草

論吳敏劄子

臣聞春秋之義揚善伐惡垂著王道以詔萬世然晉文

公乘惠懷之無親得返其國高梁之禍天下之大惡也而春秋不書周襄王出居于鄭晉文為之誅子大叔以定其位陽樊之師諸侯之極功也則又不書而書晉文斷自伐曹侵衛之後是何故也聖人之意以為晉侯既有大惡亦有極功絕此補彼使得相除是以皆沒不書一與之新而後踐土之勲爛然獨著於春秋使王道而不本忠恕如此則晉侯入國之惡不除蓋誅絕之不暇豈復有此霸業之偉哉傳曰記人之功忘人之過宜為

君者也其義蓋出春秋臣伏見宣和之季金人用兵上下大震不知所為吳敏以給事中伏閣請對首建內禪之策以堅外禦之心是時太上皇帝久懷沖挹然而外無朝廷之助內有左右之沮堯舜之志未有以發也會敏白發其端擊節歎息遂定大議淵聖皇帝自在東宮恭儉聞天下及嗣位乍萬方相慶乖離之心一變歸往至今天下固不可解夫使人君以天下傳此古今之所至難言也而敏以孤臣眇然冒雷霆之威忘家族之禍

而建明之此天下之奇節而去歲秋唐恪聶昌耿南仲
陳過庭等用事百計誣譖竄之涪川傷忠義之心折蹇
諤之氣非所以視天下觀臣子也陛下龍興四海蒙澤
當此時始望生還而坐城下之盟復竄嶺表使其垂白
重親泣血萬里臣誠傷之且城下之盟自有主其議者
敏于是時未為宰相衆說眩亂依違其間至於金敵已
還敏為宰相遂決意追襲但為己失事機斯敏之罪云
爾得譴不當與衆人等以是遂廢定策之功則己重矣

今錄其過因廢其功臣竊謂必非仁聖本意當時議者
不詳失於建明而已謂宜明詔還之赦智謀之不逮著
忠力之無忘以勸事君非小補也且臣當去歲之春數
詆朝廷專和議則于敏非敢私也當彼隆盛之時臣與
之爭及此斥逐而為之言區區何心其間端為國體而
已矣

繳盛章詞頭劄子

今日日承中書省刑房送到詞頭一道盛章落職差提

舉南京鴻慶宮襄州居住何訢落職差提舉亳州明道
宮本處居住者按章姦慝之迹久已不逃聖鑒幸蒙陛
下天地函容前濯獎感冀收其報而章之凶險根于天
資孤負明恩終不思草顯謫既行公議交慶然臣尚有
所未喻者襄陽乃章墳墓之國章于州城北營大第雲
屋潭潭申於諸路功役資費不出其家徒以威聲氣焰
劫使郡縣侵牟百姓騷動一方至今冤痛之音未絕也
而又使以其身往彼其貪忍之資不待親執州權民必

重被其患襄陽之人亦何負哉今何訢坐與交通已徙
它州而盛章重有姦邪倨傲不恭之罪乃獨歸安其第
均為斥逐重輕不倫且使為人臣者姦慝未章則要職
美官揚厲於公朝罪惡既暴則真祠厚祿優游於私室
小人夫亦何憚而不為此雖一盛章之休戚何足以言
而繫廷臣之勸沮不得不慮所有詞頭臣未敢具草謹
錄奏聞伏候敕旨

論李邦彥劄子

臣近論宰相白時中李邦彥執政王孝迪等去位不出
都城非祖宗法今時中孝迪已詔赴鎮而邦彥未去臣
竊計陛下祇以邦彥前日曾有節損一言之善故未遽
遣臣若不為陛下盡言陛下無由悉其本末按邦彥之
心雖無深阻但材質浮薄學術寡陋初附梁師成王黼
位執政而蔡攸薦之為宰相童貫蔡攸之行也身見河
朔流離將亂幕中賓客多勸攸貫說上皇以節損而攸
貫等自知富貴已極但乏衆庶之譽故其還朝以賓客

言時時從容為太上道之太上慨然思一大變時事而
邦彥適為宰相遂與攸貫協力然邦彥才術不足以果
斷忠固不足以持守故徒紛紛卒無所補論邦彥心止
於如此若數其罪不勝誅矣何者當取燕山之時邦彥
身為執政坐視禍變不為一言去歲復起雲中之役人
益寒心邦彥身為宰相阿意詭隨又不救正若邦彥當
此之時不知事勢必亂是無識也知而不言養交持祿
是不忠也無一可者逮至倉卒敵騎渡河邦彥但謀竄

身不急召兵保城遂至失備幾危社稷昔漢家盛時水旱薄蝕皆以天災策免丞相今者邦彥執政六年於此而大位內禪萬方外騷宮闈播越宗廟震驚畿甸殘破生靈屠戮此豈止水旱之災薄蝕之變也哉在昔法義主辱臣死尚復何逃陛下仁聖幸赦不誅謂宜以禮自圖進退乃復遵用蔡京王黼故事身為宮使留居都城禮視見任執政耽寵昧利無大臣體夫大臣罷政而猶留都城者必為其人時可咨訪有補國家也臣考邦彥

相道君於安平之時則忠益未見輔陛下於艱難之際
則智謀不聞留連趙趙亦復何為且邦彥素擅朝廷進退
在位故今廷臣二三顧望疑將復用莫敢公言願陛下逐
出邦彥使士大夫壞植散羣一意首公為朝廷用則法義
昭明於上而輿衆慰釋於下其於邦彥恩已厚矣取進止

論釋氏劄子

竊料今天下僧與在籍而未受度牒者又有田園力役
之隸合集不減百萬豪傑之士猾賊之民往往隱於其

間以祖宗之英武削平五代之亂即使塔廟錯峙於四方必有深意蓋國家所以棲育豪傑而導之使歸措天下於無事之一術也昔者秦苻堅以百萬之衆敗於東晉悔不用釋道安言梁元帝用陸法和部曲弟子擒任約因侯景燕盜沙門法長為天子破北平郡轉寇廣都白狼宋盜推沙門道養為蜀王改元置百官衆十餘萬魏法秀構亂平城幾危高祖又法慶號大乘賊攻陷州郡殺刺史三年而後定唐僧圓淨連李師道謀屠洛陽

此皆著在史冊班班可考以古推今則所謂豪傑猾賊
雜有其間無疑也惡可以忽而不綏靖之自釋氏入中
國歷魏世祖周高祖及唐武宗凡三廢斥然魏世祖時
宋帝江南周高祖與陳齊三分天下唐武宗世三鎮割
據河朔是皆僧有所牒唐之都城藩郡皆有留守若夫
舉天下而盡廢之使之窮極此古昔未之嘗試也兵法
歸師勿遏窮寇勿追圍城必缺是豈有愛于敵哉勢有
所不可故也方今天下以六合為家不可以魏周唐比

伏覩手詔冠巾僧徒禁梵語以一道德而凡庸不喻聖度之涵容籍籍以謂遂將剋革經文更造佛像則是實廢其教涕洟愁蹙若無所歸今若但易其號名而不變其容服人必安之必欲丕變猶宜期以數年俟其鬚髮既服使無媿於冠巾又一切如舊之詔儻加佛像經文四字以上庶幾乎反側安矣道家有言其微易散是故燦烟方發則一指滅之而有餘原燎既揚則萬夫撲之而不足方今念非太師莫能精為上言此者某不勝感

恩慕用之心獻其私憂過計於門下

論建官劄子

按此首從名臣
奏議中補入

臣聞成周以來官不必備故唐建六曹三百年間尚書
之見於史者不過數人國家凡中都官亦多缺而不補
至崇寧間蔡京用事乃始盡補臺察之缺當時佞臣稱
賀以為賢才衆多自是省寺之間始備官矣方今當且
罷不急之務裁可省之官至於諸道郡縣之吏祖宗所
無者皆宜量事定制裁去冗濫庶幾安民豐財以濟武

事且多故時振興蠱壞則有隨事之宜又當增官置吏者非一若不暫損所緩以赴所急素食猥衆則國將何以給之